

Certificazion dal furlan: consegnâts i prins atestâts pal nivel B

Eros Cisilino, president de ARLeF: "Un travuart tocjât in graciis de colaborazion cul Assessorât regionâl ae Istruzion e cu la Universitât dal Friûl"

A son stâts consegnâts i prins atestâts di certificazion de cognossince de lenghe furlane. Ae cerimonie, te sede de ARLeF - Agenzie regionâl pe lenghe furlane, a àn partecipât il so president, Eros Cisilino; il diretôr de Agenzie, William Cisilino, e Massimo Duca, president de comission di exam.

*"Chescj a son i prins risultâts impuartants di un percors ambiziôs che o vin tacât cualchi an indaûr e che al jere pardabon spietât dal teritori: la certificazion linguistiche pal nivel B, ven a stâi il nivel che plui di chei altris si pee cul mont dal lavôr, cu la amministrazion publiche e cu la scuele. La certificazion e je un dai obietîfs principâi e essenziâi des leçs che a son ae fonde de promozion e de tutele de lenghe furlane. Par chest prin sucès o vin agrât ae Region Autonome Friûl-Vignesie Julie, cul grant lavôr dal Assessorât cun a cjâf Alessia Rosolen, e ae Universitât dal Friûl, cul retôr Roberto Pinton che, in prime persone, al à metût a disposizion dutis lis competencis plui altis dal nestri ateneu. Si scuën sigûr ringranciâ ancje i docents e i participants che a àn dimostrât une grande dedizion e il desideri di cognossi la nestre lenghe. Cun chest prin travuart, si salde un avignî che si posizione inte fasse alte des miôr politichis linguisticis in Europe", al à marcât **Eros Cisilino, president de ARLeF**, in ocasion de cerimonie di consegne dai atestâts di certificazion.*

I dîs candidâts che a àn passât l'esam - che al è stât fat ai 27 di Novembar stâts inte Universitât dal Friûl - a àn frontât cuatri provis: prin di dut la comprension orâl, fate scoltant une registrazion e rispuindint a un test a rispueste multiple; po dopo e je stade la comprension scrite, cheste volte cun trê eserciziis là che i candidâts a àn vût di completâ frasis cu la peraule juste o di meti adun elements; la tierce prove e je stade la produzion scrite, cuntun teme di 500 peraulis suntun argument gjavât a sorte; par finî a àn sostignût un piçul colocui orâl cui certificadôrs. Passâ dutis lis provis ur à permetût di otignî la certificazion pal nivel B,chel "intermedi" daûr dal CCER, il cuadri comun european di riferiment pe cognossince des lenghis, scrite e fevelade, fat bon cuntune risoluzion dal Consei di Europe tal Novembar dal 2001, che al è ricognossût a nivel internazionâl pe valutazion des competencis e des capacitâts linguisticis.

I nivei pe lenghe furlane a son cuatri: A, elementâr; B che o vin za analizât; C1 avanzât; C2 paronance in situazions complessis.

Udin, ai 20 di Març dal 2025

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<